

Pahlawan Tanah Air

AHMED ORABI

(III)

(Oleh: ‘Abd al-Raḥman al-Rāfi ‘ī)

Pergerakan yang sedang dikemudi oleh Ahmed Orabi telah bertambah kuat apabila orang-orang yang menentang siyasah Perdana Menteri Riyad Basha telah bersidang lalu mendirikan persatuan “al-Ḥazab al-Waṭanī” (Parti Kebangsaan). Pada 4 November 1879 mereka pun mengeluarkan surat siaran yang pertama kali bagi pertubuhan itu yang mengupas soal-soal politik.

Walaupun Riyad Basha puas menyiasat hendak mengetahui nama orang-orang yang bertanggungjawab dalam penyiaran surat tersebut supaya mereka dihukum buang negeri ke Sudan, tetapi usaha itu sia-sia belaka.

Sebaliknya mereka telah mengutus Adīb Ishāk ke Paris bagi menerbitkan sebuah akhbar yang akan menentang siyasah Riyad Basha. Adīb Ishāk telah belayar ke Paris setelah kedua buah akhbar: “Mesir” dan “*al-Tijarah*” telah diberhentikan oleh Riyad dan di Paris ia telah menerbitkan akhbar “*al-Qāhirah*” yang berdasar menyerang siyasah Riyadh di Mesir dengan kancangnya. Walaupun akhbar itu telah diharamkan oleh pemerintah tetapi dapat juga dibawa masuk ke Mesir dengan jalan curi.

Ahmed Orabi dalam buku peringatannya menulis: “Bahawa Persatuan al-Ḥazab al-Waṭanī telah didirikan oleh pembesar-pembesar, alim ulama, dan cerdik pandai bangsa Mesir, dan terdirinya ialah kerana perasaan tidak puas hati

melihat pengaruh kerajaan Eropah dalam pentadbiran kerajaan Mesir.”

Persatuan al-Ḥazab al-Waṭanī yang baharu tertubuh itu telah mengisytiharkan wujudnya lalu menuntut:

Pertama-Segala tanah-tanah dan harta benda yang dinamakan “Hak Milik Khedive” hendaklah dikembalikan kepada kerajaan Mesir.

Kedua- Nas perjanjian yang menetapkan supaya hasil pendapatan perkhidmatan keretapi diuntukkan bagi membayar hutang negara yang terkenal dengan nama “Hutang Istimewa” hendaklah dihapuskan. Sekiranya pihak Inggeris yang memberi hutang itu tidak menyetujui tuntutan ini, maka mereka hanya dibolehkan menerima hasil yang tersebut (hasil perkhidmatan keretapi) sahaja dengan tidak mengambil baki faedah hutang itu yang telah ditentukan bagi mereka daripada lain-lain hasil negeri.

Ketiga- Hutang-hutang yang istimewa, yang sedang berjalan dan yang lainnya itu hendaklah disatukan menjadi satu hutang sahaja dengan dijamin oleh harta benda rakyat dan negara dengan wang faedah sebanyak empat peratus.

Keempat- Hendaklah didirikan suatu Jabatan Penasihat Kebangsaan yang khas bagi sementara yang masuk di dalamnya tiga orang asing, iaitu dipilih oleh kerajaan-kerajaan Eropah

dan diakui oleh kerajaan Mesir.

Sebab-sebab yang mengenai iktisad

Kedudukan iktisad pula tidak kurang buruknya daripada kedudukan siyasah, bahkan keburukan itu saat-saat mendorong rakyat kepada bangun memberontak. Hutang-hutang yang telah dipinjam oleh Khedive Isma'īl yang telah menjadi suatu beban yang besar kepada negara, sehingga kerajaan terpaksa menentukan kerananya setengah daripada kesemua hasil negeri bagi menutup wang bunga hutang-hutang tersebut. Keadaan yang demikian buruknya ini sudah tentu menjadikan rakyat jelata resah gelisah, kerana wang pembayaran bunga yang demikian besarnya, yang dipungut pada tiap-tiap tahun dari titik peluh kaum tani. Bermakna memutihkannya mata rakyat jelata daripada mencecap hasil tenaga mereka dan menghamburkannya untuk kepentingan golongan pemberi hutang itu, lebih-lebih lagi apabila difikirkan besarnya cukai-cukai yang dikenakan itu dan pembahagiannya dengan cara yang tidak adil, serta cara pemotongannya dengan menggunakan kekerasan.

Semuanya ini menjadikan rakyat jelata bersatu padu dan bangun memberontak, bertambah pula ketika itu kuasa orang asing yang mencengkam Mesir telah melampaui batas sehingga telah membolot iktisad negeri. Malahan mereka (orang-orang asing) telah dapat keistimewaan terutama saudagar-saudagar dan golongan-golongan yang mempegiakan wang dengan bunga sehingga mereka menjadi kaya raya atas hitungan perbendaharaan Mesir dan atas hitungan rakyat anak-anak Mesir sendiri.

Dalam pada itu golongan terpelajar dan cerdik pandai bangsa Mesir makin bertambah tidak puas hati memandangkan sikap kerajaan dalam masa pemerintahan Jemaah Menteri Riyad Basha yang telah menyerah kepada tuntutan pihak orang-orang asing (pemberi hutang) dan kerajaan-kerajaan mereka. Kerajaan Riyad telah mempersetujui peraturan Jabatan Penasihat tambahan menurut sebagaimana yang telah dirancang oleh kedua-dua

konsul: Inggeris dan Perancis, dan telah memberikan kepada kedua-dua Pegawai Penasihat Eropah itu kuasa yang sangat luas di dalam urusan pemerintahan dan kewangan. Dengan perantaraan kedua-dua Pegawai Penasihat yang tersebut, kuasa orang Eropah telah bertambah luas dalam kerajaan dan di luarnya, disebabkan kerajaan Riyad telah menunaikan tuntutan pemodal-pemodal Eropah, dan membenarkan mereka mempegiakan hasil-hasil pengeluaran Mesir dan segala lapangan iktisadnya. Dalam zaman pemerintahan Riyad Basha terdirilah syarikat-syarikat perniagaan yang makin menambahkan berleluasanya kuasa pengaruh Eropah dalam segala lapangan iktisad di Mesir, seperti mendirikan bank (didirikan pada 15 Februari 1880), mendirikan syarikat kilang gula, syarikat am yang menjalankan kerja pembangunan di seluruh negeri Mesir, syarikat pemborong dan lain-lainnya. Kesemua itu ialah syarikat-syarikat asing dengan modal dari Eropah dan beranggotakan orang-orang Eropah. Sedang surat-surat perjanjian yang membenarkan syarikat-syarikat itu didirikan tidak menjaga masalah anak negeri. Sikap kerajaan mementingkan masalah modal-modal asing seperti yang disebutkan itu dan membiarkan berleluasa dalam iktisad negeri, semuanya ini adalah meninggalkan kesan yang buruk yang menjadikan orang ramai tidak puas hati kepada tindakan kerajaan yang demikian, sementelah pula perbuatan-perbuatan yang tersebut pada zatnya adalah tidak patut dan bertentangan dengan masalah anak negeri.

Suatu lagi siyasah kerajaan mengenai iktisad yang tidak kurang buruknya ialah sikap kerajaan mengurangkan jumlah tentera kerana hendak menyelamatkan belanja. Pengurangan ini yang sebenarnya ada sebabnya yang lain yang berhubung dengan siyasah iaitu titah Sultan Turki kepada Khedive Tawfiq yang meminta supaya jumlah tentera dikurangkan menjadi delapan belas ribu orang sahaja. Tetapi sebabnya yang mengenai iktisadlah yang lebih besar kesannya dalam pengurangan ini kerana bilangan tentera telah dikurangkan hingga menjadi dua belas

ribu orang iaitu kurang daripada yang telah ditetapkan oleh perintah Sultan itu sehingga bukan sedikit askar-askar dan pegawai-pegawai tentera yang telah menderita kerana tindakan kerajaan yang demikian dan tidak pelik kalau mereka telah menyatukan diri dengan orang ramai yang tidak puas hati dan bangun memberontak.

Kakitangan kerajaan dari anak negeri juga tidak kurang perasaan tidak puas hati mereka kerana telah menyaksikan bagaimana kedua-dua pegawai penasihat Eropah itu berleluasa. Lebih-lebih lagi apabila memandang pengaruh orang-orang Eropah dalam jabatan-jabatan kerajaan dan bagaimana jumlah mereka makin bertambah banyak dan mendapat keistimewaan-keistimewaan dengan gaji yang besar.

Jelasnya, daripada apa yang telah disebutkan itu nyatalah bahawa pemberontakan yang telah dipimpin oleh Ahmed Orabi itu dari segi siyasah adalah suatu pemberontakan yang telah menyala kerana menentang kemaharajalelaan dan keadilan! Dan dari segi iktisad: Suatu pemberontakan yang menentang kemasukan kuasa Eropah dalam urusan iktisad Mesir, dan menentang keadaan iktisad yang buruk yang sedang dideritai oleh rakyat pada masa sebelum berbangkit pemberontakan itu.

Sebab-sebab yang berhubung dengan masyarakat

Keadaan masyarakat Mesir adalah melayakkannya dengan tidak syak lagi- sebaik-baik sahaja diseru- supaya bangun memberontak membebaskan diri. Yang demikian adalah disebabkan tersiarnya pendidikan dari zaman Muḥammad ‘Alī al-Kabīr. Sekolah-sekolah yang telah didirikannya dan rombongan penuntut-penuntut yang telah dihantarnya ke luar negeri, telah mengeluarkan suatu lapisan rakyat yang telah terdidik dengan berbagai jenis ilmu pengetahuan. Rasanya tidak tersembunyi bahawa ilmu pengetahuan itu adalah mendidik jiwa dan menerangi mata hati, membangunkan akal fikiran dan membawanya meningkat

tinggi kepada mencapai kemajuan kemanusiaan serta menggerakkannya kepada meneladani bangsa-bangsa yang merdeka dalam pemberontakan menentang kemaharajalelaan. Kebangkitan ilmu pengetahuan adalah mempunyai kesan-kesan yang tak dapat dimungkiri pada mengarahkan fikiran golongan terpelajar kepada membantah perbuatan-perbuatan maharajalela dan kepada bercita-cita mendapatkan kebebasan dan undang-undang tubuh kerajaan.

Kebangkitan ilmu pengetahuan telah berpadu dengan kebangkitan ilmu persuratan, yang terdiri di atas usaha ahli-ahli syair dan pengarang-pengarang serta penulis-penulis dari hal-hal persuratan ilmu pengetahuan dan persuratan adalah mempunyai kesan-kesan yang besar bagi menyediakan fikiran menerima pemberontakan dan bagi menjalankan dakyah kerananya. Sebenarnya syair-syair yang telah diciptakan oleh penyair-penyair dan makalah-makalah yang telah ditulis oleh ahli-ahli persuratan serta ucapan yang telah dihamburkan oleh pensyarah-pensyarah pada hari-hari keramaian sangatlah besar kesannya kepada menyalanya pemberontakan itu.

Surat khabar pula sudah tentu sangat besar pengaruhnya dalam membukakan fikiran orang ramai dengan segala yang ditulis berkenaan perkara am di Mesir dan di luar negeri, dan dengan makalah-makalah yang berbagai-bagai mengenai siyasah dan soal-soal masyarakat serta dengan tulisan-tulisannya yang menarik perhatian terhadap perkara-perkara yang mendatangkan faedah dan membidas perkara yang berbahaya.

Di antara sebab-sebab pemberontakan yang berhubung dengan masyarakat ialah pengaruh Sayyid Jamāl al-Dīn al-Afghānī dalam masyarakat Mesir. Melalui tangannya telah terbentuk suasa angkatan Islam yang terpelajar dan bebas fikiran mereka daripada perasaan beku dan khurafat. Dengan jasanya juga ilmu persuratan dan ilmu ucapan atau pidato telah bertambah maju di Mesir. Majlis-majlis ilmunya bukan sahaja tertentu kepada penuntut-penuntut tetapi telah meliputi alim ulama pegawai-pegawai kerajaan dan pembesar-pembesar

-sambungannya pada muka 27

-sambungan dari muka 18 negeri al-Sayyid Jamāl al-Dīn al-Afghānī yang berjiwa besar dan berakhlak mulia pun berusaha menipukan semangat perasaan mulia dan berbudi dan memerangi perasaan hina dan diam membeku. Dengan pengaruh sahsiahnya, didikannya, kata-katanya dan cara hidupnya, telah membentuk suatu cara pendidikan yang telah mengangkat taraf diri murid-muridnya ke tempat yang tinggi. Hasil didikannya yang demikian dari semasa ke semasa, telah menjadi usaha yang berkesan dalam kebangkitan umat Mesir yang telah mulai sedar dan terus berubah dari berkeadaan tunduk dan diam membeku, kepada suatu bangsa yang telah bangkit mencari kebebasan dan menunjukkan tidak puas hati terhadap cara pemerintahan yang sedang berjalan dan keburukannya, dan membantah akan perbuatan kerajaan-kerajaan Eropah mencampuri urusan negeri Mesir.

Walaupun al-Sayyid Jamāl al-Dīn al-Afghānī telah dikeluarkan dari Mesir dalam zaman pemerintahan Khadive Tawfiq, tetapi roh dan semangatnya, dasar-dasar dan pengajarannya telah meninggalkan kesan yang besar di dalam masyarakat Mesir, dan telah menyediakannya kepada bangun memberontak sehingga boleh dikatakan kebanyakan pemimpin-pemimpin pemberontakan itu adalah terdiri daripada murid-muridnya atau orang-orang yang telah terpengaruh dengan pengajarannya. Sekiranya ia masih tinggal di Mesir sehingga berbangkit pemberontakan adalah dipercayai ia akan menyokongnya dengan buah fikirannya yang berhikmah dan pengalamannya yang luas, yang akan menjadikan pemberontakan itu berjalan terus dan tidak terpesong daripada dasarnya yang telah ditetapkan. Malangnya dengan hasutan kuasa-kuasa Eropah al-Sayyid Jamāl al-Dīn telah dibuang negeri dalam masa Mesir sangat-sangat berhajat kepada buah fikirannya dan pandangannya yang tepat dalam perkara-perkara yang dihadapi.

Orabi Memimpin Tentera

Pada saat yang mencemaskan itu, pegawai-pegawai tentera kedapatan mencari-cari akan salah seorang daripada mereka yang

akan memimpin dan menyatukan tujuan mereka kepada menuntut hak-hak mereka yang halal, mereka pun mendapati Ahmed Orabi itulah dia pemimpin yang sedang mereka mencarinya. Sifat-sifat pemimpin memang cukup pada dirinya. Sahsiahnya kuat dan menarik serta mempengaruhi orang-orang yang di sekelilingnya. Ini ialah sifat pemimpin yang utama. Tutar katanya pula sangat-sangat memuaskan pendengar-pendengarnya. Ini pula adalah menjadi tanda kuat sahsiahnya. Jika tidaklah kerana sahsiahnya yang besar dan kuat itu nescaya tidaklah ia akan sanggup mengumpulkan tentera dan pegawai-pegawainya kepada mencintainya, dan masuk di bawah pimpinannya, serta menurut perintahnya.

Boleh dikatakan tahun 1881 itulah tahun ia mulai menjadi pemimpin angkatan tentera Mesir yang utama. Pada tahun itu 'Uthmān Rufqī (seorang bangsa Sharkusi) sedang menyandang jawatan Menteri Perang. Sebenarnya dasar Menteri Perang inilah jua yang menjadi sebab menyalanya pemberontakan Ahmed Orabi, terutama apabila dia mengeluarkan perintah menukarkan beberapa pegawai-pegawai tentera daripada anak negeri Mesir kepada beberapa jawatan yang lebih rendah dan tidak layak mereka menyandanginya lalu digantikan oleh pegawai-pegawai tentera dari orang-orang Sharkusi.

Ketika mendengar perintah ini, Ahmed Orabi berkata kepada pembawa berita itu: "Ini adalah satu suap besar yang tidak akan dapat ditelan oleh Uthman Rufqī".

Satu mesyuarat telah diadakan dengan rakan-rakan seperjuangannya dan akhirnya Ahmed Orabi telah dipilih menjadi pemimpin. Mereka telah bersumpah di atas pedang dan Quran bahawa mereka sedia taat setia kepadanya dan sedia mengorbankan nyawa kerana mempertahankan kehormatan diri dan tanah air.

(bersambung)